

**Inatsisartunut aalajangiiffigisassaattut siunnersuutigineqarpoq, Naalakkersuisut peqquneqassasut danskit inatsisit attortinneranut ministerianut attaveqassasut Kalaallit Nunaanni Eqqartuussiveqarnek pillugu inatsisip allangortinneqarnissaa pillugu. Allanguut periarfissaqartitsilissaaq hashimik pinerluttoqarsimatillugu aamma allatigut peqqarniitsumik pinerluttoqarsimatillugu, politiit ilisimannittunik illersuinissannut, taamaaliornikkut unnerluussamut taassumalu illersuisuanut ilisimannittup aqqanik kalerriussingissinnaallutik.**

(Inatsisartunut ilaasortaq, Steen Lyngge, Atassut)

### **Akissuteqaat**

(Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoq)

### **Siullermeerinnineq**

Atassut sinnerlugu Inatsisartunut ilaasortaq, Steen Lyngge, aalajangiiffigisassatut siunnersuuteqarmat Naalakkersuisut sinnerlugit qutsavigaara. Siunnersuut aammalu tunngavilersuutitut tunuliaqutaasut, Naalakkersuisut pinerluttulerinermi suliassanik sunniuteqarluarnerusumik suliarinnittarnissamut aammalu hashi akiorniarlugu suliniuteqarnermut anguniagaannut naapertuulluinnarput.

Siunnersuuteqartutuulli haship inuiaqatigiinnut kalaallinut ajoqutaasumik sunniuteqaatai ilungersunartorujussuuartut Naalakkersuisut isigaat. Taamaattumik pinerlunnerit hashimut tunngassuteqartut aammalu allat pinerluttuliornerit sakkortuut sunniuteqarluartumik misissuiffiginissaannut politiit pisariaqartunik sakkussaqaarnissaat Naalakkersuisut pingaartittorujussuuaat.

Aalajangiiffigisassatut siunnersuummi pineqarpoq, sakkortuumik pinerluttuliornermut unnerluutiginnittut aamma ilisimannittut kinaassusaasa paasineqarsinnaanginnissaa annertunerusumik qulakkeerneqarsinnaassasoq, taamaalillutik akiniarneqarnissamik ersissuteqarnek pissutigalugu pinerluttuliornermik paasinarsisitsiniarnermut ikiuunnissamut tunuarsimaartariaqassanatik. Taamaattumik pinerluuteqarsimasunut suliassat immikkoortuisa ataasiakkaat nalaanni, unnerluutiginnittut aamma ilisimannittut kinaassusaasa, unnerluutigineqartumut taassumalu illersuisuanut isertuunnissaannut, politiit pitsaanerusunik periarfissaqalissasut, siunnersuummi siunnersuutigineqarpoq. Siunnersuut naapertorlugu Kalaallit Nunaanni eqqartuussisarnek pillugu inatsisip allangortinneqarnissaata anguneqarnissaa siunertaralugu, Naalakkersuisut danskit inatsisinik atuutsitsinnermut ministeri attaveqarfigissussaavaat.

Eqqunngitsumik ilisimannittup oqaaseqarnera aamma eqqunngitsumik unnerluutigineqarnek akerlilerlugit sunniuteqarluartumik illersornissamut periarfissat, Kalaallit Nunaanni eqqartuussisarnek pillugu inatsisip allanguutissaatut siunnersuutigineqartup ajornerulersissinnaagai aarlerinaateqartoq, Naalakkersuisut eqqumaffigaat. Taamaattoq Naalakkersuisut isumaqarput sakkortuumik pinerluttuliornerup akiorniarnissaata eqqarsaatigineqarnissaa pingaaruteqarnerusoq, aammalu siunnersuutip sunniutissai pitsaasut, pitsaangitsunit annertunerusut, ilanngullugu innuttaasut akornanni ataatsimut isigalugu toqqissisimanerulertoqarnera siunnersuutip malitsigissagaa.

Aalajangiiffigisassatut siunnersuutip Inatsisartuni suliarineqarneranut tunngatillugu oqaatigisinnaavara, Naalakkersuisut siunnersuutip saqqummiunneqarnissaa sioqqullugu Inatsisunik atuutsitsinermut ministereqarfimmut saaffiginnissimmata, aammalu ilisimannittut najugaat siunissami eqqartuussivimmi paasissutissiissutigineqartarunnaarlugu, eqqartuussisarneq pillugu inatsisip allangortinneqarnissaa pillugu qinnuigisimallugu. Aamma oqaatigisinnaavara ilaatigut politiit pinerluttuliornernik misissuineranut periarfissaasa pitsanngorsarneqarnissaat siunertarlugu Naalakkersuisut Inatsisunik atuutsitsinermut ministereqarfik ingerlaavartumik oqaloqatigisaraat.

Taamatut oqaaseqarlutik siunnersuut Inatsisartuni akuerineqassasoq Naalakkersuisut inassutigaa.